

# Umno Sabah cipta politik nasional

BH - 11/5/2006

**M**ENATAP gambar tua hitam putih dalam buku 'Sabda Sebuah Perjuangan' laksana membaca novel roman sejarah - nostalgik dan menyentuh sukma. Koleksi gambar yang dirakam ketika zaman awal penubuhan Umno di Sabah pada 1991 mengimbau kenangan silam yang cukup bersejarah, dramatik dan penuh adegan mencemaskan.

Merengung lebih dekat potret nostalgia itu, ada yang tiada lagi di dunia manakala sesetengahnya yang kelihatan tampan bergaya, kini mula dimakan usia dan banyak menghabiskan masa bersama keluarga.

Begitu pantas waktu beredar. Se-macam masih baru tarikh 21 Februari 1991 berlalu, apabila Umno dijulang pada hari pertama benderanya berkibar secara rasmi.

Seperti baru semalam terdengar laungan 'Hidup Umno' yang bergema di Dewan Saadah, Wisma Muis, tempat perisytiharan kemasyarakatan Umno ke bumi Sabah. Masih

segar dan terngiang-ngiang. Yang berlalu menjadi sejarah dan masa lampau tidak akan kembali. Bagaimanapun, semangat dan roh perjuangan Umno terus bersinar, tumbuh subur dan berakar teguh.

Buku setebal 240 halaman yang menghimpunkan lebih 500 keping gambar hitam putih dan berwarna itu adalah karya bersama Hussain Kasau dan Ariffin Arif ke arah menyorot kembali dan menjejaki sejarah penubuhan Umno di Sabah.

Ia mirip esei bergambar sebagai bahasa penyampaian paling mudah. Menatap gambar itu bermakna kita menelusuri sejarah peradaban dan tamadun bangsa.

Ketua Menteri merangkap Pengerusi Badan Perhubungan Umno Sabah, Datuk Seri Musa Aman, berkata sejarah Umno Sabah cukup panjang dan berliku serta mencatat peristiwa tidak mungkin dilupakan.

"Pengalaman itu akan mendewasakan kita. Masa lalu mencipta berbagai-bagai peristiwa dan menjadi asas berguna merancang masa de-



**PEMIMPIN BERJASA:** Timbalan Perdana Menteri yang juga Timbalan Presiden Umno, Datuk Seri Najib Razak menerima cenderahati daripada wakil UMNO Sabah, Datuk Bung Mokhtar Radin (kiri) sambil diperhatikan Musa (dua dari kanan) selepas merasmikan mesyuarat perwakilan Umno di Dewan Sandakan, Sabah tahun lalu.

pan," katanya.

Musa merumuskan pengalaman lampau adalah sumber patriotisme yang perlu dimiliki setiap rakyat, khususnya ahli Umno. Umno Sabah yang kini berusia 15 tahun banyak mencipta sejarah tersendiri antaranya pengenalan sistem penggiliran jawatan Ketua Menteri yang dimansuhkan.

Malah, kemasukan Umno ke Sabah memecahkan tradisi sebagai parti berpusat di Semenanjung dengan slogan ketuanan Melayu.

Kini ramai masyarakat Bumiputera Sabah termasuk bukan Islam menjadi ahli Umno. Lebih penting, Umno mengukir sejarah dengan menamatkan budaya politik sempit negerian dan menghentikan puta-

ran ganas kerajaan dan budaya 'tukar baju' setiap kira-kira 10 tahun atau dua penggal pemerintahan.

Musa berkata, dasar dan perjuangan Umno yang berteraskan nasionalisme rumpun Melayu atau Bumiputera progresif dan dinamik berjaya menarik minat lebih 400,000 rakyat negeri ini untuk menyertai arus perjuangannya.